

Kico si nos pone humanidad prome y reglanan despues?

UTRECHT - Manera e rapper Drake lo bisa "What a time to be alive"...esta un tempo pa ta na bida mi hendenan. Cuanto badabada den noticia y entre muhenan bunita competiendo pa un corona y hendenan pafo di un aeropuerto ta protesta, mi ta pensa esta un desaster.

Prome cu mi cuminsa papia di locual di berdad mi kier papia, mi kier bisa algo. Y no ta cu mi ta zona manera un hater of cu mi ta jaloers pasobra "mi no ta bunita of flaco suficiente" pa participa, beyesa ta bin den tur size y ma dicidi cu mi size ta cute okay.

Pero, bueno sinceramente hende no ta cansa di e mundo di beyesa? E no a bira laf y outdated caba? I mean te ki dia nos mester wak e crème de la crème di beyesa rond di mundo ta desfila den bikini pa "prove a point" esta cu bo tin cu ta mas cu bunita? Sabiendo, cu pa nan beyesa so e

muhenan ki podise ta wordo trata miho cu e muhe comun y coriente cu ta cana rond.

Di berdad nos mester certamentan di beyesa ainda? Y si e mundo di beyesa ta malo, mas pio ainda ta e obsesion sadistico cu nos isla tin cu ne. En todo caso, spera mi por wak tur hende ta elogia y apoya masalmente otro cosnan local cu tin un poco mas peso social y un impacto mas leu cu caricia nos egonan. Pasobra ta aparenta, cu si no ta riba un plataforma internacional hende no ta worry.

Ta hopi den sociedad ta keda sufri di "low self-esteem issues" y ta keda warda te ora media internacional duna nos validez pa grita cu nan ta orguyoso.

Anyways, bek na papia di cosnan mas importante manera humanidad. Recientemente mi a reach out na mi amigo cu ta di e religion moslim pa puntr'e con bay y con e ta sinti. Mirando tur e odio cu ta wordo benta constantemente riba su religion y su hendenan mi tabata tin e basta presente den mi pensamentonan. E ta bisa mi cu e no ta comprende e odio, cu e ta lesa e comentarionan bou di e noticieronan Hulandes y e ta considera sali di e pais. E problema ta cu e, mescos cu un otro amiga dimi e ta un refugiado. Pues e no tin papel y e no ta wordo defendi ni pa su pais di origen ni pa Hulanda, e ta biba letterlijk den aire.

Fuera di e echo cu mi ta considera e un di e personanan mas bunita cu mi a yega di conoce den mi bida y cu porta mi ta te hasta un poco 'biased' pasobra mi ta pensa mi ta un poco namora di e prins aki di Afghanistan. E berdad ta cu ami tampoco ta comprende e odio contra hendenan cu ta asina bunita. Di berdad, na Hulanda e prome hendenan cu a trata mi cu decencia tabata e moslimnan. Mi a dreña un tienda di Turco y nan tabata comiendo y sin pensa dos bialha nan a ofrece mi un tayo. E unico muhenan cu ta hari cu bo den central station of den bus ta of Caribense of nan tin hijab bisti.

Ta rond di moslim ta manera ta rond di hende Caribense simplemente cu un diferente contexto cultural. Mi ta corda e dia cu nos tabata sinta na mesa na universidad. E prins di Afghanistan, su ruman muhe, un Hulandes y ami. E prins tabata conta di con media ta manipula Islam. E ta conta cu den Islam muhenan tin un posicion mas halto cu homber y cu ta berdad cu nan ta permiti di tin mas cu un casa, pero esaki ta solamente si nan por stima y cuida nan tur mesun cos. E ta conta mi cu su mama ta un moslim moderno y cu e no ta ni bisti un hijab y cu su tata ta permiti esey. Un sin fin di storia el a comparti cu mi. Pero manera tur otro hende cu a bay laga nan pais bou di circunstancianan peligroso e tambe kier bay cas.

E ta yora pa su Afghanistan pasobra el a bay Hulanda cu 4 año y e nunca a conoce su patria. Den un poema yama "home"



skirbi pa Warsan Shire, cu a bira e himno di refugiadonan rond di mundo, e poeta di Somalia, cu tambe a scapa guerra ta bisa: "Niun hende ta scoge campeonan di refugiado, of prizon pasobra e ta mas sigur cu un ciudad na candela, niun hende kier wordo humiliya, bati, discrimina.

Niun hende ta laga nan cas al menos cu cas ta den boca di un tribon. Bo solamente ta core bay na e frontera ora bo ta wak full bo ciudad coriendo tambe"

Y esaki ta locual mi kier hende corda, cu den e temponan aki unda odio y xenophobia ta muestra di ta at an all time high, ora e presidente mas poderoso di mundo no ta haci mas cu pusha palo bou candela y stigmatiza minorianan y un religion.

Corda, cu media ta traha cu agenda, cu nan no ta bay bisa bo kico pa pensa pero nan lo bisabo riba kico pa pensa si.

Cu si algo wordo ripiti hopi bialha bo ta bay cuminsa kere cu e ta un berdad.

Tempo mi tabata na Aruba juni, mi a muestra e mi amiganan un potret di e prins di Afghanistan cu tur su amigonan ta gosa na Croatia, nan prome reaccion tambe tabata "Yakari, nan tur ta bon dushi pero hala leu di terorista."

Pa bo por dreña un otro hende su pais tin reglanan berdad, pero reglanan no por bin prome cu un hende su humanidad.

Media hopi facil por pone hende comun y coriente muestra manera nos enemigonan ora nos ni conoce nan. Den e temponan aki, nos mester tene horeanan y wowonan habri, pero nos curason tambe. □